

Die Rotwei(n)-Maus

En Bottich, der is gfillt mit Wei,
Un do blumbst grad e Maisel nei.
Mein Gott, en nasser Tod, der droht em
im große Meer aus Wei, aus rotem!

Des Meisel strampelt, workst un schlickt,
doch schließlich ist es ihm geglickt,
im nasse Element, im kalte
sich iwwer Wasser... äh, Woi zu halte!

Schnell möcht die Maus zurück ans Land,
Doch wie se hikummt an de Rand,
Hockt do, mit Kralle an de Tatz
E große, scheckisch bunti Katz!

Die Maus verschreckt un schwimmt zurück,
Un schlorbst vor Angscht noch zwä, drei
Schlick.
„'s iss gut", denkt unser Maisel dann,
Dass so e Katz nit schwimme kann!
Solang ich in dem Bottich schwimm,
Do iss die Sach noch halb so schlimm!
Doch unser Katz denkt: "Ich bin gscheit
Un kann aa warte! Ich hab Zeit!"

Die Maus werd mied, ehr Glieder schwer,
Kee Wunder, in dem Rotwei-Meer!
Versaufe möcht se nit im Wei,
Doch wenn schon mol muss gschorbe soi,
Dann lieber dorch en Katzebiss,
Weil des "maus-standgemäßer" is!

Drum piepst se: "Liewi Katz do draus,
Mei Kraft loßt noch - des Spiel is aus!
Ersaufe will ich nit do hinn ...
Nee, lieber in deim Mage drin!

Die Katz sagt: "Los, mach kee Finesse,
Dann *Maus in Weisoß'* iss mei Fresse!"
Doch's Maisel ruft - blass wie en Rettich -
"Ee allerletschti Bitt noch hett ich:
Ich spier den Wei von all der Hatz;
Wann ich an Land geh, liewi Katz,
Dann dormel ich ganz ferchterlich,
Un dodevor schenier ich mich.
Drum bitt ich dich in aller Ruh:
Petz grad mol schnell die Aache zu.
Solang bloß, bis ich rausgekroche.
Dann bin ich dei mit Haut und Knoche!

Die Katz voll Fräd uff Maus-Raguh
Segt: "Gut, ich mach die Aache zu!"
Doch wie se nochher leis und sacht
Die Aache wieder uffgemacht,
War's Maisel längscht schon in de Gäng
Vum sichre Mauseloch, dem eng(e).

Die Katz kummt her ans Loch gekroche:
"Du hoscht mir doch so fescht versproche,
Dass ich die fresse derf sofort!
Warum stehscht nimmi zu deim Wort?"

Do segt mei Maisel pffiffig druff:
"Wäscht, mer verspricht halt viel im Suff!"

Aus
Helmut Metzger
Ebbes
Ein heiteres Versbuch in Pfälzer Mundart
Karlsruhe 1978

Schreibweise leicht verändert.

